



Pranuar / Dorezuar Prilijeno/Prodato Received/Delivery	12-05-2021	1	viti god year
Organ /Njesia Organ./Jedinica Org./Unit	Nr Prot Br Prot Prot No	Shtojca Prilog Appendix	Sasia Kolicina Quantity
SKOMBHEK	2374/2021		1/4



Republika e Kosovës
Republika Kosova – Republic of Kosovo

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
NEZAVISNI NADZORNI ODBOR CIVILNE SLUŽBE KOSOVA
INDEPENDENT OVERSIGHT BOARD FOR THE CIVIL SERVICE OF KOSOVO

A.nr.198/2021

Këshilli i Pavarur Mbikëqyrës për Shërbimin Civil të Kosovës-Kolegji për shqyrtimin e ankesave në përbërje nga: Eshref Shabani-kryetar, Malsore Gashi Bajraktari dhe Arben Mehmeti -anëtarë me Flakron Gashi-Zyrtar i Lartë për Bashkëpunim Profesional në cilësinë e procesmbajtësit, ka shqyrtuar ankesën me numër A.nr.198/2021 të datës 29.03.2021 të parashtruar nga ankuesi me adresë banimi: Rruga "Muharrem Fejza", Mati-1, Komuna e Prishtinës, kundër organit të punësimit Gjykatës së Apelit të Kosovës, në çështjen juridike "kompensim material", duke vepruar në pajtim me nenin 6 paragrafin 1.1 nën paragrafin 1.1 dhe nenin 18 paragrafin 1 nën paragrafin 1.1 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, në seancën për këshillim dhe votim të mbajtur më datën 12.05.2021, mori këtë:

V E N D I M

- I. REFUZOHET si e pa bazuar** ankesa me numër A.nr.198/2021 e datës 29.03.2021, e parashtruar nga ankuesi
- II. MBETET në fuqi** vendimi numër KA.nr.15/2021 i Komisionit për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës i datës 16.03.2021.

A r s y e t i m

Ankuesi sipas akt emërimit të datës 01.04.2019 i punësuar në Gjykatën e Apelit të Kosovës në pozitën "Zyrtar i Teknologjisë Informative", i pakënaqur me institucionin punëdhënës për shkak të mos realizimit të shtesave në pagë sipas vendimit nr.02/39 të datës 08.10.2008 të Qeverisë së Republikës së Kosovës, me datë 25.02.2021 ka parashtruar ankesë në Komisionin për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës.

Komisioni për Zgjidhjen e Kontesteve dhe Ankesave i Sekretariatit të Këshillit Gjyqësor të Kosovës me datë 16.03.2021 ka nxjerr vendimin numër KA.nr.15/2021 me të cilin e ka shpall veten jo kompetent për të shqyrtuar ankesën e ankuesit

Ankuesi i pa kënaqur me vendimin e Komisionin për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës, me datë 29.03.2021 ka parashtruar ankesë në Këshillin e Pavarur Mbikëqyrës për Shërbimin Civil të Kosovës me numër protokolli 1440/2021.

Këshilli i Pavarur Mbikëqyrës për Shërbimin Civil të Kosovës më datë 19.03.2021 ka dërguar kërkesën për përgjigje në ankesën e ankuesit tek Sekretariati i Këshillit Gjyqësor të Kosovës. Më datë 15.04.2021 Sekretariati i Këshillit Gjyqësor të Kosovës ka kthyer përgjigjen në kërkesë me dosjen e bashkangjitur të lëndës me numër protokolli:1808/2021.

Kolegji për shqyrtimin dhe vendosjen e ankesave ka administruar këto prova: Ankesa e ankuesit e datës 29.03.2021 e parashtruar në Këshillin e Pavarur Mbikëqyrës për Shërbimin Civil të Kosovës; vendimin e Komisionin për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës të datës 16.03.2021 më numër KA.nr.15/2021; Akt emërimin e datës 01.04.2019 me Numër:211/19; Kërkesën për pagesat e shtesës për zyrtarët TIK e datës 10.05.2019 me numër A.gj.nr.292/2019; E-maili i datës 16.05.2019 dërguar nga _____ për _____ me korrespondencën e bashkangjitur prej 7 (shtatë) faqesh; Autorizimin e DASHC/MAP të datës 21.01.2019; Konkursin e datës 21.01.2019 me numër Nr.03/2019; Aprovimin e pozitive dhe shtesave në pagë për kategori të veçanta të profesioneve deficitare në KGJK të datës 05.12.2008; Vendimin Nr.02/39 të datës 08.10.2008 të Qeverisë së Republikës së Kosovës; Formularin e shpenzimeve në kuadër të Gjykatës së Apelit; Organogrami i strukturës organizative të Gjykatës së Apelit; Kërkesa për përgjigje në ankesë e datës 19.03.2021; Përgjigja në kërkesë e datës 15.04.2021; Ankesën e datë 25.02.2021 e parashtruar në Komisionin për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës; E-maili i datës 18.11.2020 dërguar nga _____ për _____ ne korrespondencën e bashkangjitur prej 3 faqesh.

Kolegji për shqyrtimin dhe vendosjen e ankesave, për vendosjen e kësaj çështje, duke u bazuar kompetencat e tij dhe pasi ka shqyrtuar të gjitha shkresat e bashkangjitura të lëndës, ka konstatuar se ankesa e ankuesit **është e pa bazuar, sepse:**

Kolegji për shqyrtimin dhe vendosjen ankesave, ka shqyrtuar pretendimet ankimore të ankuesit i cili pretendon për njohje të plotë të shtesës në pagë sipas Vendimit Nr.02/39 të datës 08.10.2008 të Qeverisë së Republikës së Kosovës.

Kolegji për shqyrtimin dhe vendosjen ankesave, gjatë shqyrtimit të provave të lëndës, ka konstatuar se institucioni punëdhënës i ankuesit përmes e-mailit të datës 16.05.2019 iu ka drejtuar zyrtarisht Departamentit për Administrimin e Shërbimit Civil/MAP respektivisht Kryesuesit të Komisionit për shtesa të Teknologjisë Informative me shkresën numër A.gj.nr.292/2019 për pagesën e shtesave mbi pagën bazë për ankuesin i cili mban pozitën “Zyrtar i Teknologjisë Informative”.

Po ashtu, Kolegji për shqyrtimin dhe vendosjen ankesave, gjatë shqyrtimit të provave të lëndës, ka konstatuar se ankuesi për shkak të mosrealizimit të shtesave mbi pagën bazë me datë 25.02.2021 ka parashtruar ankesë në Komisionin për Zgjidhjen e Kontesteve dhe Ankesave të Sekretariatit të Këshillit Gjyqësor të Kosovës, ndërsa Komisioni për Zgjidhjen e Kontesteve dhe Ankesave i Sekretariatit të Këshillit Gjyqësor të Kosovës

me datë 16.03.2021 ka nxjerr vendimin numër KA.nr.15/2021 me të cilin e ka shpall veten jo kompetent duke konstatuar se përgjegjës për shqyrtimin e kësaj kërkesë është Komisioni për Shtesa të Teknologjisë Informative në kuadër të Ministrisë së Administratës Publike.

Kolegji për Shqyrtimin dhe Vendosijen e Ankesave, gjatë shqyrtimit të ligjshmërisë së pretendimeve ankimore të ankuesit, ka analizuar Vendimin Nr.02/39 të datës 08.10.2008 të Qeverisë së Republikës së Kosovës, përmes të cilit është aprovuar lista e pozitave dhe shtesave në pagë për kategori të veçanta të profesioneve deficitare në fushën e teknologjisë informativë dhe inxhinieringut, dhe Vendimin Nr.07/29 të datës 31.07.2008 të Qeverisë së Republikës së Kosovës, me të cilin është përcaktuar procedura për parashtrimin dhe trajtimin e kërkesave dhe mënyra e realizimit të shtesave për kategori të veçanta të profesioneve deficitare, dhe rrjedhimisht është konstatuar se aprovimi i shtesave në pagë për pozita deficitare është bërë me qëllim të ruajtjes së kategorive të veçanta deficitare të punonjësve, stimulimit të konkurrencës për profesione të veçanta deficitare dhe zbatimit të parimit të pagesës së njëjtë për punë të njëjtë në të gjitha organizatat buxhetore. Po ashtu, me këtë vendim është përcaktuar se paga bazë së bashku me shtesat mbi pagë nuk mund të tejkalojnë pagën e zyrtarëve të lartë të emëruar nga KELP-i, si dhe është obliguar Ministria përgjegjëse për Administratë Publike dhe Ministria e Financave për shqyrtimin e listës dhe standardëve kualifikuese dhe shumës stimuluese për postet e caktuara, se paku një herë në muaj.

Kuvendi i Republikës së Kosovës, me datë 13.05.2010 ka aprovuar Ligjin Nr.03/L-147 për Pagat e Nëpunësve Civil, përmes të cilit është bërë përcaktimi i sistemit dhe strukturës së pagave, shtesave dhe kompensimeve të tjera për nëpunësit civilë, ndërsa me dispozitat e nenit 14 të këtij ligji është përcaktuar se: *1. Shtesat mbi pagën bazë janë: 1.1. shtesa për punë me ndërrime dhe jashtë orarit të punës; 1.2. shtesa për kushte specifike pune; dhe 1.3. shtesa për kushtet e tregut.* Përkritazi me këtë, duke u bazuar në dispozitat e nenit 27 të Ligjit Nr.03/L-147 për Pagat e Nëpunësve Civil, Qeveria e Republikës së Kosovës, me datë 24.12.2012 ka aprovuar Rregulloren Nr.33/2012 për Shtesat në Pagë dhe Kompensime të Tjera të Nëpunësve Civil, përmes të cilës ka përcaktuar kushtet dhe procedurat për shtesat dhe kompensime të tjera mbi pagën bazë të nëpunësve civilë. Me hyrjen në fuqi të kësaj rregullore janë shfuqizuar të gjitha aktet nënligjore të cilat kanë rregulluar shtesat dhe kompensimet tjera të nëpunësve civil, dhe rrjedhimisht edhe Vendimi Nr.02/29 i datës 31.07.2008 dhe Vendimi Nr.02/39 i datës 08.10.2008 i Qeverisë së Republikës së Kosovës, konstatim ky i dhënë edhe në Raportin Vjetor të Vitit 2017 të Këshillit të Pavarur Mbikëqyrës për Shërbimin Civil të Kosovës, kështu që duke u bazuar në këtë konstatim, Kolegji vlerëson se pretendimi ankimor i ankuesit për realizimin e shtesës në pagë sipas Vendimit Nr.02/39 të datës 08.10.2008 të Qeverisë së Republikës së Kosovës, tani më është i pa bazuar.

Kolegji për Shqyrtimin dhe Vendosijen e Ankesave, bazuar në dispozitat e Rregullores Nr.33/2012 për Shtesat në Pagë dhe Kompensime të Tjera të Nëpunësve Civil, përkatësisht nenin 8 të kësaj rregullore, ka arritur të konstatojë se Ministria përgjegjëse për administratë publike, në bashkëpunim me ministrinë përgjegjëse për financa, mund të kërkojë nga Qeveria e Republikës së Kosovës që të miratojë një shtesë për kushtet e tregut për pozitat ose llojet e pozitave për të cilat niveli i pagës për personelin e ngjashëm nga organizatat dhe punëdhënësit e tjerë jashtë Shërbimit Civil është së paku 40% më i lartë sesa niveli i pagës që ofrohet nga Shërbimi Civil, e kjo shkakton vështirësi të konsiderueshme në rekrutimin dhe mbajtjen e personelit të kualifikuar për ato pozita ose lloje të pozitave në administratë publike, ndërsa institucioni për realizimin e shtesës për kushtet të veçanta të tregut duhet t'i ofroje Ministrisë përgjegjëse për administratë publike kërkesën lidhur me arsyeshmërinë e realizimit të shtesës dhe një analize që dëshmon vështirësitë të cilat janë hasur nga institucioni gjatë rekrutimit dhe mbajtjes së personit të kualifikuar, listën e pozitave përkatëse dhe



koston vjetore të vlerësimit financiar. Si dhe shtesa mbi pagën bazë për kushte të veçanta të tregut nuk mund të tejkalojë më shumë se 50% të pagës bazë.

Andaj, pas analizimit dhe vlerësimit të të gjitha shkresave të lëndës si dhe duke u bazuar në nenin 6 paragrafin 1 nën paragrafi 1.1 dhe nenin 18 paragrafi 1 nën paragrafi 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Kolegji vendosi si në dispozitiv të këtij Vendimi.

Vendimi hyn në fuqi në ditën e nënshkrimit nga Kryetari i Kolegjit

Këshillë juridike: Kundër vendimit të Këshillit, pala e pakënaqur e cila pretendon se vendimi i Këshillit nuk është i ligjshëm mund të iniciojë konflikt administrativ në Gjykatën Themelore në Prishtinë-Departamenti për Çështje Administrative, brenda afatit prej tridhjetë (30) ditësh, nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

Këshilli i Pavarur Mbikëqyrës për Shërbimin Civil të Kosovës
Lënda me numër A.nr.198/2021

Flakron Gashi

Zyrtar i Lartë për Bashkëpunim Profesional

Eshref Shabani

Kryetar i Kolegjit



Vendimi i dorëzohet:

- Ankuesit
- Drejtorit të Përgjithshëm të Sekretariatit të Këshillit Gjyqësor të Kosovës;
- Udhëheqësit të Burimeve Njerëzore në Sekretariatit të Këshillit Gjyqësor të Kosovës dhe
- Arkivit të KPMSHCK-së

